

Zeitschrift: Il glogn : calender dil pievel : annalas per historia, litteratura e cultura romontscha

Band: 9 (1935)

Artikel: Las lavinas

Autor: Lutz, L.

DOI: <https://doi.org/10.5169/seals-881247>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Siehe Rechtliche Hinweise.

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. Voir Informations légales.

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. See Legal notice.

Download PDF: 21.05.2025

ETH-Bibliothek Zürich, E-Periodica, <https://www.e-periodica.ch>

Las lavinas

Daferton ch'il plaid „lavina“ fa sin ils habitants della bassa negina impressiun, vegnan ils habitants dils aults en alteraziun, cura ch'els audan quel, pertgei che bein biars han dellas lavinas mo trestas regurdientschas.

Daco vegn ei tontas lavinas? Sur de quei savess ins scriver bia. Biaras, fetg biaras de nossas teissas spundas ein tut niuas e blutas. Ina lavina sa rumper ora aschigleiti ch'igl ei pli che 25 grads teiss u spundiv. Ils bials uauls, che serasavan pli baul sin quellas spundas han stuiu ceder, seigi quei tras pinar giu entiras tendas en ina, sco ei vegneva fatg avon onns, ni per auters motivs. Entochen che la lescha forestala-federala ei veginida, eran ils uauls gie per mintgin libers, e vegnevan tractai dals singuls mender che sch'ei fuss stau facultad privata. In' excepziun fagevan sulettamein las „schétgas“. Quellas vegnevan pertgiradas cun tutta rigurusedad; vegniev' ei gie smanatschau de tagliar giu il maun seniester a quella persuna, che scheva traplar en ina schetga cun segir ne resgia. Biaras de nossas spundas ein senza uaul e car-schentan aschia il prighel de lavina per tuts quels che stattan ellas montognas, ni che visetan quellas en temps de bia neiv.

Rumper, rumpa la lavina ora aschi spèrt che la peisa della neiv, che schai sin quella spunda, ei pli greva ch'il sustegn suten, tras il qual la neiv vegn schiglioc retenida. Il prighel crescha, pli gronda e pli teissa che la spunda ei. Generalmein rumpan las lavinas ora en in'altezia de 1500—2500 meters s. m. Onns de nevadas schai en quella altezia ina cozza de neiv de 2 meters e varga. Bia spundas fan la masira de 6—8 hectaras ed aunc dapli. Ins quenti pia mo tgei quantum neiv, ch'ei serimna tier ina tala lavina.

Ei drova ussa mo aunc quel che muenta la lavina e per quella lavur drov' ei ni strias ni striuns. Quei sa esser: Sulegl, suffel, specialmein cu' i cuffla, mar-schauna anetga, rumper ora cufflaus, mo era glieud e tiers, che traversan talas spundas, san caschunar la lavina. Tier la glieud sa quei esser cun e senza skis. Ils habitants dils aults han generalmein bien sentiment, ins savess bu-namein dir: instinct, cura ch'igl ei prighel de lavinas, mo els san era secu-glienar, sco nus vegnin a veser ord las suondontas disgrazias. Grond prighel eis ei, cura ch'ei ha dau in tschuat neiv e neiva aunc continuadamein, entochen che la neiv ei buc aunc seserrada; medemamein cura ch'ei cuffla mo sils fils els aults. Per aschiditg sco ei neiva e cuffla duei negin ira en loghens pereclitai de lavinas, num en cass fetg urgents.

Las lavinas han, sco l' aura, negina regla. Biaras vegnan pliras gadas ad onn, autras mintg' onn e puspei autras mo derar, mo persuenter ein quellas generalmein las pli nauschas. Inaga rumpan ellas si miez la spunda e l' altra gada si sumsum. Biars manegian, cura ch' ei seigi vegniu giu empau, sche seigi il prighel buca aschi gronds pli, mo era quei ei buc adina il cass. Rumpa la lavina ora si miez igl emprem e suenter sisum (pia en duas gadas), sche sa il prighel esser bia pli gronds, pertgei quella dil davos ha lura in irl dir e schelau e vegn cun bia pli stermentusa forza per val.

Nus enconuschein lavinas de freid, neiv grad dada u cufflaus; lavinas de cauld, nua che tut rump' ora entras marschauna anetga. Muort la gronda canera che las lavinas de cauld fan, san ins tgunschamein fugir de quellas; persuenter suprendan quellas de freid glieud e tiers aschi anetg, ch' ins sa strusch co.

Sin tgei san ins mirar, cura ch' ei gl' ei prighel de lavina? Cheu dat ei bia meinis.

Il versau perveseder, che sto la damaun, dis de prighel, bandunar casa e familia per ir a perver en loghens prigulus, tschenta siu pei ella neiv avon casa e tila puspei ora quel ord la neiv, vegn lu la rusna fatga entras quei pei emplenida cun neiv, lu ei il prighel fetg gronds, ed il perveseder sto far tutta pusseivla attenziun.

Vischins de Tujetsch pretendan era, che la glina hagi sia influenza, mo nus havein mai saviu far quella experienza. Denton ston ins era en quei grau schar su a mintgin. Con differents ils prighels san esser,lein nus mirar cun repassar enzacontas disgrazias ord la Val Medel.

1870 gia avon s. Martin ei in giuven catschadur de Mutschengia serendius en la val Pazzola a catscha e vegius satraus d' ina lavina.

1888 per mesiamna della tschendra, cura ch' ils vischins de Curaglia mavan vi Platta a messa, ein treis umens vegni surpri dalla lavina de Val de Crusch. Dus han anflau la mort e mo in ha pudiu sesalvar.

1891 mond in perveseder de s. Roc vi Matergia a perver, ha la lavina de Matergia surpriu el ed el ha stuiu tener leu.

1917 ils 8 de november ha in giuven de Curaglia, encurend cauras en Val Cristallina stuiu piarder sia giuvna veta, cun traversar ina spunda, ch' ei rutta ora e satrau el e quei malgrad che siu compogn ei immediat daus sissu e cavau ora el, mo la mort veva gia stenschiu el.

1917 ils dus d' avrel, la sera, suenter haver neviu tudi, ei vegniu giu ina lavina a Palli e devastau 3 baghetgs dil tut cun biestga e tiers menedels. Era dus umens fuvan vegni suten. In de quels ha pudiu liberar sesez e l'auter ha stuiu spitgar sin agid. Suenter in per uras eis el vegius cavaus ora sauns e tafers. Vulend ina colonna d' agid, consistenta ord treis tudestgs internai e dus vischins de Curaglia ira a Palli en agid als disgraziae, ei quella colonna vegnida surprida dalla lavina de Val Sontget e fieris tuts treis a tiara. Dus

internai ed ils vischins de Curaglia, han pudiu sedeliberar, mo il tierz internau ei vegnius starmenaus sper la pun giu e staus mureri morts.

1931 ils 20 de fevrer allas 7 della damaun, ha la lavina dil Sfrac sur Platta devastau l'ustria della Posta e satrau 11 persunas; 4 han pudiu sedeliberar, ni ein vegnidias liberadas; 7 persunas han ins cavau ora mortas, la consorta cun siu fegl e la dunna de quel cun lur quater affons pigns.

Tgei sa vegnir fatg encunter las lavinas? Nos vegls eregevan rempars en fuorma de cugn avon ils baghetgs per cheutras fender la lavina. Medel ha de quels a s. Gagl, Clavarut sur Acla e Platta. Els davos decennis han ins entras baghiar leusi els auts gronds mirs, terassas etc. vuliu impedir il rumper ora lavinas. Quei ei caras lavurs e mo pusseivlas entras gronds subsidis dil cantun e della confederaziun. Ins ha era plantau uaul denter en. Sulet il manteniment schai sin las vischnauncas e lez ei en bia loghens fetg custeivels. Grondas lavurs en quei senn, ha il cantun Glaruna fatg; mo era nies cantun ha fatg il siu.

Denton ussa ein ils raps vegni scarts, ed ei ha num serestrenscher era en quels fatgs e turnar anavos tiel vegl e far rempars-cugn per schurmetg dils baghetgs. Quels ein buca aschi custeivels ed il manteniment ei era pigns; pertgirai vegnan cheutras ils baghetgs, mo igl auter prighel resta. A Platta han ins fatg 1932 dus de quels mirs de ca. 6 m altezia. In 90 m liungs e l'auter 40 m. Il meglier schurmetg ein e restan ils uauls, perquei um grischun, hagies quitau de tiu uaul.

Pudessan quellas lingias far attents in u l'auter dis de prighel e cheutras pertgirar de novas disgrazias, sche havessan ellas cuntenschiu lur fin e mira. Il Tutpussent pertgiri nus tuts dellas lavinas!

L. Lutz, forester, Curaglia.